

顏氏家藏尺牘

附
考姓

四



顏氏家藏尺牘

附姓氏考

(四)

顏光敏輯

徐

中華民國二十四年十二月初版

輯者 顏光敏

發行人 王雲五
上海河南路五

印刷所 商務印書館
上海河南路

發行所 商務印書館
上海及各埠

王雲五主編
叢書集成初編
顏氏家藏尺牘
附姓氏考
四冊

(本書校對者楊伯屏)

陸

顏氏家藏尺牘姓氏考

馮溥字孔博號易齋山東臨朐人遷益都順治四年進士歷官大學士加太子太傅諡文毅有佳山堂集山東通志溥生八歲授左氏春秋暨秦漢以下古文卽能貫串根柢稍長窮極經史凡天文圖緯及兵書地志罔不博綜陞吏部侍郎時尙書孫廷銓病目右侍郎石申亦以事注籍凡一切推補溥獨主之一秉至公無所曲庇康熙初年四大臣秉政議各省遣大臣二人巡察督撫溥力爭以爲不可乃止陞左都御史有申嚴職任暨省刑薄稅諸疏拜大學士時薦魏象樞成性又有發帑備荒疏在閣二載開誠布公表裏洞達既不詭隨又不矯激商略大政或僉謀可用卽庶僚不遺若義所不可卽貴近交口而溥必力爭改正總求有益於國而中無成心王士正漁洋詩話馮氏自閬山先生起家進士以詩名海岱間四子惟健惟重惟敏惟訥皆有詩名兼工詞曲惟訥纂古詩紀風雅廣逸諸書有功藝苑惟重之孫文敏公琦也文毅則惟訥之元孫云

龔鼎孳字孝升號芝麓安徽合肥人明崇禎七年進士官兵科給事中國朝歷官禮部尙書諡端毅有定山集名家詩鈔小傳芝麓官斬水令以殊尤徵爲御史坐言事下獄甫論釋而明社屋入本朝用大臣薦以原官起用屢起屢仆卒以才名受世祖之知嘗謂左右龔某下筆千言如兔起鶻落眞當今才子也湖廣通志鼎孳令斬水值流寇猖獗籌畫方略調度兵餉修城池登陴防禦不少休王士正感舊集補傳生

時庭產紫芝。因自號芝麓。

曹溶字潔躬。號秋岳。自號金陀老圃。浙江秀水人。明崇禎十年進士。官御史。國朝歷官戶部侍郎。終山西陽和道。康熙十八年。舉博學鴻詞。以憂不赴。有續徵錄。劉豫事蹟。崇禎五十年宰相傳。學海類編。金石表。靜惕堂詩文集。沈季友橋李詩繫。溶天性耿直。爲御史。劾輔臣謝陞削籍。熊開元密參周延儒。廷杖。溶疏白其冤。甲申爲流賊所執。拷掠三晝夜。委廐中。得不死。後任副憲時。遇熱。審多平反。居塞上五年。歲饑。力請拯救。生平肆力於文章。諸體雄駿。而尺牘尤多。長牋小幅。人爭寶之。其詩源本少陵。蒼老之氣。一洗嫵調。與合肥龔鼎孳齊名。世稱龔曹。晚年自號鉏菜翁。築室范蠡湖。顏曰倦圃。蒔花種竹。置酒唱和。無虛日。愛才若渴。四方之士。倚爲雅宗者四十年。

葉方藹字子吉。號詡庵。江蘇崑山人。順治十六年進士。第三人及第。歷官禮部侍郎。特加禮部尙書。諡文敏。有讀書齋偶存稿。四庫全書總目。方藹初著有觚齋集。後自棄其稿。此集皆入仕以至歸田之作。其詩導源蘇陸。不及王士正。秀骨天成。而和雅春容。颯颯乎治世之音也。蘇州府志。方藹升講讀學士。屢被顧問。賜宴瀛臺。撰八箴以進。聖祖善之。撰太極圖說。賜貂裘文綺。

高辛允一名辛傳。陝西韓城人。明崇禎十六年進士。官大理評事。國朝歷官工部侍郎。陝西通志。辛傳提調順天鄉試。會中使送兩生入闈。辛傳斥之。世祖廉得其事。召對乾清宮。嘉其風節。屢加超擢。韓故小邑。土狹民稠。資食於延綏各路。亂後盜賊出沒。辛傳疏請設兵神道嶺。防守有資。邑距潼關三百里。輓運維

難再疏請免。

劉思敬字純之江蘇上元人順治四年進士歷官參議有徹牘八編江南通志思敬十歲能文任刑部郎中執法無所避分校禮闈得士最盛尋擢參議乞終養修江南省志

劉體仁字公馥河南潁川衛人順治十二年進士歷官吏部考功司郎中有蒲菴集七頌堂集識小錄河南通志體仁生而英異目重瞳五歲父於膝上授大學中庸及就傳經史一覽成誦居郎署三年輦下諸名士爭欲識之體仁尤好獎借寒賤藏書二萬餘卷告歸後日手一編不問戶外事詩筆一出人士競傳誦之居家孝友睦婣恂恂可接王士正池北偶談公馥慷慨任俠意氣自許嘗遊睢陽睢陽守贈遺頗厚歸經人家墓田徘徊久之曰此地自佳惜葬不合法不急遷且有奇禍因迂道訪其家爲主人道之曰公誠長者顧力不能遷奈何劉曰是易耳盡解囊中裝與之而去此與漢書原涉事頗相類又云公馥在鳳陽與其友蘇懋游銘孝廉往龍興寺與某禪師扣擊竟日晚歸遂化去是夜蘇夢公馥來微笑頌詩曰六十年來一夢醒飄然四大御風輕與君昨日龍興寺猶是拖泥帶水行馮仙湜圖繪寶鑑續纂公馥性嗜六法蕭疎曠遠思筆高妙乘興寓意亦自天然

沈荃字貞蕤號繹堂又號位菴又號充齋江蘇青浦籍華亭人順治九年進士第三人及第官詹事加禮部侍郎諡文恪有充齋集南帆詠江南通志荃父紹曾有至行聚徒授業荃爲河南大梁道有政績洊歷詹事學行醇潔名重館閣書法尤推獨步爲聖祖所賞士以一長來謁者輒爲噓植子宗敬兼工書畫仕

至四譯館卿。松江府志。荃爲大梁道副使。殲盜首董天祿、牛充大等。餘黨解散。以他事望謬。部降同知。召見復四品。仍入翰林。充齋者。爲大梁道時。孫夏峯爲講充實之爲美數句。有省。遂以自號。在詹事。新例當流者。徙烏喇極北。荃謂烏喇距蒙古三四千里。地不毛。極寒。人畜輒凍死。罪不至死。不應驅之死地。召令畫一。堅持前議。聖祖改容納之。又言山海關、海洲差員宜撤。湖口關宜仍徙九江。有司盜案。處分過嚴。反滋諱盜。不果行。

繆彤。字歌起。號念齋。江蘇吳縣人。康熙六年進士第一人及第。歷官侍講。江南通志。彤以艱歸。淡於官情。遂專以課後學爲事。巡撫湯斌內召。奏吳中縉紳。以道義自持者。彤爲首。先是彤爲庚戌同考官。所拔如許自俊、郭琇輩。皆知名於世。

徐乾學。字原一。號健菴。江蘇崑山人。康熙九年進士第三人及第。歷官刑部尙書。有讀禮通考、資治通鑑後編、憺園集、四庫全書總目。乾學家富圖籍。所著皆閎通淹貫。確有可傳。集中考辨議說之類。亦多與傳注相發明。蓋乾學爲顧炎武之甥。而閻若璩等亦多客其家。師友淵源。具有所自。故學問頗有根據。蘇州府志。乾學八歲能文。爲顧錫疇所知。十三通五經。主試順天。若心披閱。拔韓莢於遺卷中。明年莢遂大魁天下。文體爲之一變。轉禮部侍郎。一切禮制。酌古準今。多所釐正。轉刑部尙書。甫就職。會湖南巡撫張汧以罪被逮。誣乾學通賄。事白。上疏乞歸。上不聽。令解部務。仍領各館總裁。明年復爲副都御史。許三禮所劾。再疏乞歸。命攜一統志、宋元通鑑。卽家編輯。乾學慷慨有大志。生平敦兄弟之好。急朋友之難。尤勤於

獎進人物。海內之士。輻湊其門。名既高。而又與有力者不相下。故卒爲所逐。

郝惟訥。字敏公。直隸霸州人。順治四年進士。歷官吏部尙書。諡恭定。祀鄉賢。有恭定集。畿輔通志。惟訥性謹慎。操持廉潔。初登進士。與父傑同朝。士大夫多爲欣羨。而惟訥恂恂守儒素風。累官吏部尙書。杜絕請託。奸胥不敢有所上下。銓政以清。王士正居易錄。霸州郝氏。自戶侍公傑。以學吃虧三字揭堂額。其子恭定。公世守之。恭定弟惟謙。丙戌舉人。監察御史。惟謬。江西布政司參議。惟謙子士鈞。戊辰進士。翰林院庶吉士。弟士錚。舉人。戶侍公弟位。舉人。子惟訓。壬辰進士。廬州府推官。惟謨。癸丑進士。內閣中書舍人。都人以爲盛德之報。聞駕至霸州。幸其第。親見之云。

吳元萊。江蘇興化人。明國姓子。貢生。歷官禮部侍郎。

孫承澤。字北海。號退谷。山東益都人。順天上林苑監籍。明崇禎四年進士。官兵科給事中。李自成僭位。受僞職。爲四川防禦使。國朝歷官吏部侍郎。有尙書集解。九州山水考。詩經朱傳翼。春秋程傳補。五經翼。畿輔人物志。益智錄。元朝典故編年考。天府廣記。河紀學典。春明夢餘錄。己亥存稿。庚子銷夏記。閒志軒帖考。四庫全書總目。承澤初附東林。繼降闖賊。終乃入於國朝。自知爲當代所輕。故末年講學。惟假借朱子以爲重。畿輔通志。承澤築退谷於西山。耄而好學。亹亹不倦。於吏事多所論述。而有明一代典故。尤瞭如指掌。至於博古精鑒。一時圖書之富。比之宋田氏云。承澤退谷小志。京西之山爲太行第八陁。自西南蜿蜒而來。近列爲香山諸峯。乃層層東北轉。至水源頭。一澗甚深。退谷在焉。復有高嶺障之。而臥佛寺及黑

門諸刹環蔽其間。岡阜迴會。竹樹深蔚。幽人之宮也。

法若真。字漢儒。號黃石。山東膠州人。順治二年。以五經特賜中式。授中書舍人。次年成進士。改國史院編修。歷官安徽布政使。康熙十八年。薦試舉博學鴻詞。有黃山詩留四庫全書總目。若真詩古文詞。少宗李賀。晚乃歸心少陵。不屑櫛比字句。依倚門戶。意所欲爲。不古不今。自成一格。張謙宜法徵君傳。徵君父孝廉翁。中年無子。李夫人有身。夢法真而生。故名若真。與弟若貞同登進士。盧見曾山左詩鈔。黃石先生。以高第入翰林。再遷秘書院侍讀。與洪安南承疇。陳溧陽名夏兩相國不協。外調浙江觀察。轉補福建。禦鄭寇有功。遷浙臬。平反王式誣告等案。浙人詡爲神明。轉安藩。丁內艱歸。以詩畫自娛。卒年八十四。張庚畫徵錄。若真善山水。筆有奇趣。

李之芳。字鄴園。山東惠民人。順治四年進士。歷官大學士。諡文襄。山東通志。之芳授金華推官。燭奸理枉。讞決如神。在臺十有四年。忠謀讜議。皆關大計。彈劾不避權要。總督浙江軍務。耿逆煽動。以衢州係全浙上游。且爲江淮屏障。卽日移駐。有異議者弗聽。及耿逆重兵壓境。以甘言來誘。立斬使焚書。誓師出戰。賊勢大挫。方戰時。親冒矢石。或勸其持重。勿蹈不測。答曰。我若貪生。誰不惜死。以此人皆奮力効用。卒之大軍入閩。長驅三關。賊指日面縛。而全浙無恙。皆之芳親捍三衢力也。身在行間。歷九年。乃凱旋去。浙之日。士民號呼。如失父母。浙江通志。之芳任金華推官。浙省向苦解茶蠟。請兌折色。又輯賦役全書。縷晰條分。瞭如指掌。迄今奉爲準則。以巡鹽御史莅浙。洞悉鹽政利弊。凡不便於民者。悉除之。出督浙閩。閩逆告竣。

之芳檄諸路分守要害。遣副將黃廷梅力堵仙霞關。自趨衢州。賊衆數萬攻衢。之芳進擊於杭西。礮聲震地。流矢如雨。左右請少避。之芳曰。今日以兵勝敗爲吾死生。可稍怯耶。諸將鼓勇直入。賊遂卻。賊黨猶熾。以計招降僞將。生擒賊首。建言進取之路。不在溫處而在三衢。此賊一破。則諸賊駭亂迸散。江山常山間有間道可襲。我軍進擊。使賊首尾受敵。河西安能獨完。進克大溪灘。復江山縣。急據關口。賊將逆降。大兵遂入閩。賊平之後。疏請豁金衢五郡以前額賦。貧民陷賊來歸者。悉爲區畫衣廩。又設糜通衢。賑往來飢民。百二十二萬有奇。流移者盡復故土。

余國柱。字石臣。號倅廬。湖北大冶人。順治九年進士。歷官大學士。

杜恆燦。字杜若。號蒼舒。陝西三原人。順治五年副貢生。注銓通判。未仕卒。有春樹草堂集。四庫全書總目。恆燦卒。寧都魏禧表其墓。關中李因篤爲作傳。皆悼惜其才。春樹草堂集。凡詩二卷。文四卷。塗乙縱橫。猶當時原稿。中多代人之作。蓋恆燦爲郎廷極賈漢復梁化鳳諸人客。畢生出入幕府中。所作富贍有餘。而多不修飾。殆亦由於取辦倉猝也。陝西通志。恆燦八歲能文。值寇亂。家中落。嘗走四方。負米養親。鄉試中副車。遂入大學。念老親家居食貧。因策蹇南游。時得巨公詩文。及珍玩錦綺。歸壽其親。親大悅。恆燦居京師。與中翰吳煒交相得。同訂觀文大社。以振興古文爲志。及煒使關中。過焦穫。復廣其社於邑。中學古書院。煒去。恆燦主盟。學者多宗之。長安梁化鳳鎮崇明。遣迎恆燦。既至。化鳳以堤成出獵。恆燦陪副乘。卽事作平洋沙十章。化鳳立命譜入饒歌。持千金起爲壽。歡溢軍中。尋遊楚滇。復入吳。久之歸。性好客。所居濱

白渠南。冠蓋車騎輻輳。每酒酣耳熱。潑墨揮毫。無不厭所欲而去。一夕盡焚所著書。弟煇急起收之。得詩文如千篇。今所傳春樹草堂集也。

孫枝蔚。字豹人。陝西三原人。明諸生。康熙十八年。召試博學鴻詞。特授中書舍人。有漑堂前後續集。四庫全書總目。枝蔚於甲申闖賊亂時。曾結里中少年殺賊。失足墮坎中。幸不死。後至廣陵學賈。三置千金。旣而憮舍董相祠。扃戶讀書。在當時名甚重。然詩本秦聲。多激壯之詞。大抵如昔人評蘇軾詞。銅將軍鐵綽板。唱大江東去也。陝西通志。枝蔚性豪宕。敦氣節。博學工詩。南遊吳下。流寓邗關。以詩酒自娛。徧交吳越諸名宿。筆床硯匣。倡和無虛日。爲詩沈雄奇古。興至卽書。不事雕飾。而意致灑如。其自命在韓杜蘇陸之間。餘子不屑也。名家詩鈔小傳。豹人身長八尺。龐眉廣額。衣冠甚偉。與尤晦菴初未識面。一日晦菴集某公處。豹人甫入門。望見趨赴曰。此孫先生耶。吾固識之。相與大笑。流寓邗水。築室數楹。題曰漑園。烹魚釜鬻。隱然寓西歸之志。嘗遊焦山。遇大風。鼉作鯨吞。獨從容扣船歌曰。風起中流浪打舷。秦人失色海雲邊。也知賦命原窮薄。尙欲西歸太華眠。時人服其雅量。居易錄。豹人僑居揚州。高不見之節。予訪之。先之以詩云。集穰奇人孫豹人。新詩雅健出風塵。王宏不見陶潛跡。端木寧知原憲貧。遂爲莫逆交。乙巳余入都。豹人詩云。欲問忘情老。何名共命禽。

應搗謙。字嗣寅。又字潛齋。浙江錢塘人。諸生。康熙十八年。薦舉博學鴻詞。辭不赴。有潛齋文集。四庫全書總目。古樂書上卷。論律呂本原。大旨本蔡氏新書。而參以朱子及注疏之說。下卷論樂器制度。則本陳祥

道禮書及李之藻泮宮禮樂疏者爲多。雖未精博，尙爲簡核。浙江通志，據謙殫心理學窮極底蘊，家甚貧，環堵蕭然，而弟子日益進，立教惟以躬行實踐爲主，以不自欺爲持身涉世之本。於六經多所發明，尤精於易，嘗病世儒言易失之穿鑿，歿後河陽巡撫趙士璧刻其性理儀封張伯行刻其潛齋文集行於世。李集鶴徵錄先生之生有文在其手曰八卦左重耳右重瞳夕偕同志爲獨社取有所不爲也。有欲試其所守藏妓館舍夜醉先生而歸之。先生雒誦達旦卒不動。同里姜御史圖南致饋不受。一日遇途中方盛暑，衣木棉衣投以越葛二端，竟還之。弟子甚多，因以樓上樓下爲差。如馬融例池北偶談徵士性至孝，母病數年侍疾晝夜不懈，母強爲娶婦終不入私室。母卒逾祥禫始行合禭禮坐臥不下樓。人罕接梯者。有周易應氏集解易學圖說書經蔡注拾遺詩傳翼禮學彙編春秋集解古樂書古今孝經辯論編註古本大學中庸本義語孟朱註大全拾遺較定文公家禮自傳無悶先生傳略云學不適時不好禪不喜王陸家言爲文章不詭合自怡悅而已。密友多窮交終年不見與日見無異足跡不出百里而秦華溟渤皆於書冊見之。生不逢古人而義農堯舜若接響聲也。著書千萬言人來觀者亦不吝云云。

應禮壁度壁俱據謙子杭州府志禮壁禮琮從遊於陸隴其克承其所學。

吳懋謙字六益號苧菴江蘇華亭人有華萃豫章虔州苧菴諸集四庫全書總目懋謙早從陳子龍李雯諸人遊故力追七子之派稱詩多以漢魏盛唐爲宗然時有蹶張之失江南通志懋謙詩文與同里吳麒齊名有雲間二吳之目生平多貴游所至名公鉅卿皆與結詩社人以明七子中謝榛比之朱彝尊靜志

居詩話六益雋上之才。託跡林臯。荒茅屑篠。泥水自蔽。雅多慷慨。振刷穠纖。譎詭之習。濟於和平之音。與天寶大歷鴻烈競爽。姜兆翀松江詩鈔。懋謙名醫中秀子。中秀家淨土橋。與董宗伯。陳眉公遊。乙酉被難。懋謙負尸趨北郭。洗血葬之。廬墓三載。康熙間。海內底定。壇坫事興。乃挾冊放遊。自荆。豫。齊。晉。嶺南。薊北。晚歸老郡城。築別墅東門外。與白燕菴鄰比。稱獨樹園。年七十三卒。門人私諡曰貞碩。

吳農祥字慶百。一字星叟。浙江仁和人。明中允太冲子。諸生。康熙十八年薦舉博學鴻詞。有與圖隸史彙考。嘯臺讀史。綠窻讀史。錢邑志林。梧園雜志。唐詩辨疑。詞苑古文詞就正稿。宣齋南歸。雲鴻流鑑。嘯臺等集。詩餘。浙江通志。農祥少異敏。一覽成誦。家有賜書。鍵戶伏讀。茹經涵史。馳聘百家。詩不下萬餘首。爲文淹貫五經。尤精於易。與蕭山毛奇齡友善。然質疑問難。不肯苟同。方嫠如。吳徵君。傅徵君。十許歲。製芙蓉露下落賦。其落句云。一輩少年爭跋扈。明公從此願躬耕。旣長。構樓於別業之梧園。與弟農復登樓而去。其梯戒不聞世上語。盡發藏書讀之。徵君之至京師也。大學士馮公溥客之代舍。時稱佳山堂六子。六子者。陳維崧。毛奇齡。吳任臣。王嗣槐。徐林鴻。及徵君也。徵君薦肩揭鼻。鶴頸指爪長三寸。鬚髯。頽然淵放。得錢輒付酒家。而識徵見遠。吳下人沿復社故態。角爲尊奢。而浙西讀書。秋聲登樓。孚社及慎交諸社。爭立名字應之。各欲引徵君。徵君曰。是載禍見餉也。諸君子忘東京鉤黨事乎。不答書。亦不發視。其後天子果切齒諸爲社事者。盡搜所刊錄摧燒之。著爲令。常一應李文襄公之芳聘。爲草露布。且飲且口占授書吏。一座盡傾。久之辭去。爲畫便宜數事。文襄再拜曰。戢君良箴。吾曩日知君不盡。乃以爲文士也。袁枚隨

園詩話先生乳哺時啞啞私語皆建文遜國之事年過十歲始不復言

席居中字允口遼東錦州人有昭代詩存臥石山房稿

林璫字鹿菴浙江錢塘人有歲寒堂存稿四庫全書總目璫安溪懷古序信建文出亡爲真殊爲未考所記顏允紹郭少尹等事皆足補史之闕特敘述稍冗耳蔣炯河間嚴太守家傳跋國初西泠諸子古文以鹿菴先生爲最所著歲寒堂存稿或譏刻畫太過時近小說家然其縱橫奇肆寫一人一事精神奕奕突出紙上純得子長之神自勺庭青門外未見耦也

杜濬字于皇晚號茶村老人初名詔先湖廣黃岡人明國子助教祝進子副貢生甲申後流寓金陵有變雅堂集江南通志濬僑居白下以詩名自景陵鍾氏譚氏矯王李規摹漢魏之習流而入於淺薄獨濬不染楚風時有莆田余懷字澹心子賓碩鴻客居金陵皆以詞翰知名名家詩鈔小傳茶村以明經貢入太學與余澹心白仲調齊名南雍角藝兩司成品題甲乙無出三人右者一時有魚肚白之目乃金陵市語染房中名色也居易錄于皇客揚州人日大雪無事巾車造之論詩竟日樵蘇不爨茶話而已乙巳七夕予赴京師于皇詩云記逢人日雪造我嗷窮愁

吳綺字園次江蘇江都人選貢生薦授秘書院中書舍人歷官湖州府知府有林蕙堂集亭臯集記紅集宋金元詩永嶺南風物記四庫全書總目國初以四六名者推綺及陳維崧二人均原出徐庾維崧泛濫於初唐四傑以雄博見長綺則出入於樊南諸集以秀逸擅勝章藻功與友人論四六書吳園次班香宋

艷。接僅短兵。陳其年陸海潘江。末猶強弩。其論頗公。然異曲同工。未易定其甲乙。輒以花木爲潤筆。因名其圃曰種字林。與名士爲春江花月社。名家詩鈔小傳。綺奉詔譜楊椒山樂府。大加稱賞。遷武選司員外。蓋卽以椒山原官官之。寵異至矣。已由工部郎出知湖州府。多惠政。不畏彊禦。湖州人德之。號爲三風太守。謂多風力。尙風節。饒風雅也。所作填詞小令。兒童婦女。皆能習之。有毘陵女子。日誦其把酒問東風。種出雙紅豆。以爲秦七黃九復出。故又號紅豆詞人云。王暉今世說。園次官湖州守。爲治簡靜。放衙散帙。蕭然雜誦。繩床斐几。燈火青熒。吏人從屏戶窺之。不辨其爲二千石也。喜與賓客遊。四方名士。過從無虛日。卒以此罷官。陳維崧三芝集序。園次之守湖州也。擒治豪猾。不受請託。要人不喜也。因其招接名流。遊讌日多。以是中之。旣罷官。僦居吳門。刻其詩。又詮次其三子之詩。曰三芝集。

姜梗。字鐵夫。又字桐柏。浙江會稽人。有曹山草堂飯犢居等集。陶元藻臯亭詩話。青山吟謝朓。紅燭寫莊騷。予鄉姜鐵夫句。漁洋極賞之。然猶著色。不如其美人五湖去。夕陽鳥飛還之句。淡而彌旨。阮元兩浙輶軒錄。飯犢居樂府。五古直溯上游。五七律雄渾中。時見流麗。落照云。片帆投浦疾。獨鳥背城飛。曹山云。樵徑漸移殘照外。人家多在石溪邊。耐人吟誦。

盧元昌。字文子。自號半林居士。江蘇華亭人。諸生。有杜詩闡。唐宋八家文選。思美廬半林稿。鼓離稿。江南通志。元昌著述有盛名。詩學杜陵。操選政數十年。以壽終。姜兆翀漱芳齋詩話。半林初在彭燕。又社中與王伊人顧見山等。俱爲詩中翹楚。嘗自言少時夢至一所。高絕雲表。有榜曰離塵樓。因吟曰。草花喧畫夢。

螢火暗秋燈。醒而恐。落之識。至後果然。

紀映鍾字伯紫一字麋子號慙叟自稱鍾山野老江蘇上元人明諸生有真冷堂詩名家詩鈔小傳伯紫少與廬江龔宗伯友善宗伯既貴招至京華下榻焉歲且十稔此外未嘗輕謁一人輕投一刺如天半朱霞可望而不可卽池北偶談金陵紀青字竺遠能詩少爲諸生棄去入天台國清寺爲僧久之復舍去其子映鍾女映淮徐鉉續本事詩伯紫與方文林古度齊名白髮當歌紅牙聽曲說天台舊事娓娓不倦丁澎字飛濤號藥園浙江仁和人順治十二年進士歷官禮部郎中有扶荔堂詩浙江通志澎罷歸不問戶外事而自娛於文工爲詩頓挫清壯有沈鬱之思康熙癸亥葑浙江通志實董其事云林瑤丁藥園外傳藥園工詩賦及古文詞自少年未達時卽名播江左其後仲弟景鴻季弟濬皆以詩名世目之曰三丁兩浙輞軒錄云冊立西宮念無嫺典禮者調入東省兼主客貢使至驛廉知丁持紫貂銀鼠美玉象犀從吏人易其詩歸國少有白鳳樓詩吳下女士爭相採撫以畫衫袖後以事牽累謫塞上者五載卜居東岡躬自飯牛暇卽乘牛車手周易吟誦自若所作諸詩語多忠愛無怨悻之意則其所養又可知矣感舊集補傳吳錦雯百朋與柴虎臣紹炳陳際叔廷會張宇台洽張祖望綱孫沈去矜謙毛稚黃先舒丁飛濤澎虞景明黃昊陸麗京圻諸人齊名當時稱之爲西泠十子云

張彥之一名慙字洮侯又字峭巖江蘇華亭人明詩綜洮侯爲人寬博無同異其詩莽蒼不事繩尺質本景純而臻於嗣宗松江詩鈔洮侯幼與弟漢度几荀有三張之目初王屋讀書山在細林與陳徵君白石

山莊相望。後洮侯盡斥其田宅。卽細林別業。亦讓其弟漢度。而隱於窮巷茅舍。取遺書讀之。托於酒狂以自廢。

范鄣鼎。字彪西。山西洪洞人。康熙六年進士。十八年薦舉博學鴻詞。辭不赴。有理學備考、五經堂文集、語錄、續垂棘篇、四庫全書總目、各體雜文。本名草草。文格酷摹尙書。雖本之夏侯元昆弟誥。然未免太近游戲。語錄乃其子翻搜輯諸刻書中鄣鼎評識之語。又鄣鼎父芸茂。嘗選輯山西之文二十卷。題曰晉國垂棘。鄣鼎復取其鄉近人之文。依例彙輯。謂之續垂棘篇。前後四集。居易錄、彪西養親不仕、隱居師曠故里。講洛閩之學。河汾間人。多從授經。以博學鴻詞薦。不出。人益仰重之。

王曰高。字鑒茲。又字登孺。號北山。山東茌平人。順治十五年進士。歷官給事中。有槐軒詩文集。山東通志曰。高幼有神童之譽。在諫垣十有七年。多所建白。癸卯典江南試。得兩鼎甲。五尙書。三大學士。可稱得人之盛。

史鶴齡。字子脩。號菊裳。江蘇溧陽人。康熙六年進士。官編修。池北偶談。翰林官直講禁中。先在宏德殿。後移於乾清宮。大抵掌院學士一員。翰林官一員。惟戊午陳廷敬葉方藹日講。而上幸南海子。葉偶病。以張英代之。後葉病愈入直。遂三員同直講。史鶴齡以編修歸歿於家。特賜祭奠。其恩禮非外庭所敢望。

吳正治。字當世。號廣菴。安徽休寧人。湖北漢陽籍。順治六年進士。歷官大學士。加太子太傅。諡文僖。江南通志。正治以直講出補江西參政。轉陝西按察使。所至以清廉執法著。內擢工部侍郎。轉刑部。諸所條議。